

靖州直隶州志

第四册

靖州直隸州志

卷四

靖州直隸州志卷九

人物

乾坤清淑之氣隨地而鍾靖雖邊郡廣輪亦數百里其間山秀而深水清而激固多偉人以抒其文章經濟且堅貞之概足以嫺三閭而踵二南者尤班班可考爰擇自明以來行誼卓著者爲列傳而忠義孝友文苑處士方技以類次之詳耆壽慶人瑞也列女已未旌皆載端風始也卽僑寓於斯者亦景仰前徽而流傳勿替云

列傳

明

宋以方傳

以方字義卿號西溪宏治壬子舉人乙丑成進士歷戶部
郎中出知瑞州府瑞當南昌西境時宸濠構逆已有萌招
華林賊孽匿西山剽民間財賄爲兵費賊潛至瑞以方設
方略捕得之訊知反狀慮一日變作亂莫支乃築城練兵
儲粟爲守禦計濠知有備已忿積未發會以非法中平人
當道檄按其事悉與平反或諷使少阿可自全斥曰吾可
殺人以媚人耶濠益怒欲甘心焉適考績將之省父老遮
道畱曰公其以死行乎以方曰封疆之臣死封疆吾雖死
汝郡安矣遂行濠以他事誣奏下南昌獄及濠反破獄械
至使領兵不屈以死誓濠令繫舟中二校尉守之次鄱陽
湖以方望康郎山曰此我埋骨處也爰罵賊投水而死事

定江西湖廣巡撫交章具聞贈光祿寺卿靖立祠祀之賜
額曰嘉忠及忠義鄉賢祠皆崇祀其子崇學以蔭入監以
方性好學卽居官手不釋卷凡天文地理陰陽兵法靡不
究心其未第時夜泊鄱陽夢吏持檄曰上帝命汝作靖州
城隍以方甚訝之及守瑞始知瑞爲古靖州也終以保障
抗賊遇害其忠節蓋實天授云

張儒傳

儒嘉靖戊子舉人任順德府通判陞兩淮鹽運副使家居
時言笑不苟舉動循禮法事繼母以孝聞友愛伯仲人無
間言及在官清慎愛民暇則與府縣諸生講學習禮不倦
當聖駕南巡梓宮南耐料理夫馬協濟天津竭力盡瘁卒

於官天津人立祠祀之嘉靖三十七年祀鄉賢

陳宗武傳

宗武嘉靖甲午舉人性行端敏志趣不羣由四川建始教諭遷任邛縣知縣聲聞卓犖保荐輻輳時值通州乏守邊驚告急兵馬糧芻多取給於通當路謂非任邛縣陳某不能勝命下宗武知通州蒞治益勤殫精竭力料理糧芻以固根本通融買辦以蘇民困嚴緝盜賊以靖內地修建新城以遏外衝清查軍伍以祛邊弊膺欽賞者一薦保者八旌獎者二十有二後丁艱起復待次銓曹以疾卒於京崇祀鄉賢

唐宗正傳

宗正嘉靖甲子舉人任四川雅州時州治林箐中有菴一所僧集匪徒奪取商財標掠女子頗爲民害宗正抵任廉訪其實燬菴逐僧仍於道旁結招提以供佛像州人感德塑其像於菴內後解組歸每陰雨輒患足背瘡疾遣人往視見漏滴遺像足背修好遂愈雅人聞之謂唐公眞神人也不遠數千里至靖立碑宅左今尙存

黃肅傳

肅歲貢生任潞州知州之官時一僕一囊行李蕭然民不識爲州守在任政平事理民社晏如任滿民籲留之復任九年致仕歸

王訥傳

訥寄籍五開衛監生任直隸遵化縣丞忠厚渾朴有長者
風家居友愛尤精醫學在官理馬政士民德之隆慶五年
巡按陳于偕行州入祀鄉賢

楊方傳

方歲貢生任新野縣知縣清慎愛民輕徭薄賦盡去無名
之征勸力田給耕犢不阿權勢以勞瘁卒於官新野士民
哀之立祠祀焉

儲維傳

維選貢生任四川隆昌知縣潔己愛民教養兼舉九載慎
勤如一日致仕後百姓醵金助歸以子應爵贈奉直大夫
壽至百歲立有坊表

李淳劉伯儉傳

淳永樂初舉人任荊府伴讀教授文學端檢以老成見重於藩王宣德三年有荊府伴讀李淳勅命一道載舊志伯儉任播州宣慰司經歷時宣慰司楊相欲奪嫡伯儉不附屢鵠之不死

國朝

陳天寵傳

天寵字錫堂乾隆辛酉選拔本科中鄉試戊辰捷南宮官四川長壽知縣清操自矢勤事愛民尤加意培養士類邑人頌之丁艱回里宦囊蕭然清貧猶寒士也起復後任雲南通海政聲懋著一如宰長壽時未幾卒於官

黃鍾才傳

鍾才字位三乾隆乙酉拔貢任永順府保靖縣學教諭六十年鎮筸苗叛縣令爲節帥檄赴行營苗眾乘虛來撲倉猝間男婦老幼環城呼救者以萬計營弁司管堅不納公厲聲曰守城以衛民也今置不顧城胡守爲挺身啟北門納之呼聲振天地羣謂黃公活我當効死勿去因於稠人中得獵戶善鎗弩者百十人率敢死士分門出擊賊尸橫市井甫三晝夜潰圍竄去令歸諱其功僅以輸運微勞達上台擢遷湖北黃州府教授截取知縣鍾才性廉介唯以作育人材爲急務浙江巡撫胡興仁殿撰陳沆其門下士也致仕歸卒年八十有二

汪尙友傳

尙友字希三號益齋世居渠江之濱其先祖太學生德遠諱世尊以孝行稱有傳詳舊志尙友其長孫也尙友生而穎異長更岐嶷方弱冠補弟子員聲噪宮墻咸推名下士嘉慶歲辛酉選拔成均本科鄉試中式雖公車北上鶚薦頻膺終以未獲捷南宮與館選爲憾其以知縣歸部詮選始志不及此也由是北轍歸來作成就後學計主講鶴山十餘年其立教以敬品勵行爲先務講論文藝非根底經史力追先正者概弗錄道光十七年郡牧覺羅修州志尙友司總纂殫精竭力考据詳明晚歲絕意仕進截取班及辭弗就曰怡情於花木泉石間故又號怡園半隱卒年七

十有八

儲其材傳

其材號碧山字德華靖州在五里人又蘇太封翁子也賦性梗直血性過人勤儉自持真誠接物幼貧不能讀即買易城鄉每帶書隨行未嘗釋卷嗣又蘇公募游湖湘間材以童年侍左右未幾公歿於郴材視殯歛籌安厝又以大父在堂內無兄弟含淚奔回楊西岡先生見而重之招與游三載苦學弱冠入博士弟子員惟祖父年近九旬父骨帶二千里外越明年請於祖父任飢寒勞苦獨立孤行以懷箱歛父骨肩負歸逆旅主人拒弗納輒露宿者廿餘夜歸塋以禮祖心稍慰自此舌耕奉養祖父九十二歲艱勤

作朝夕在床褥者三年材侍奉湯藥不分寒暑不避汚穢
逐一躬親而始終不渝祖父歿卒盡哀禮旋食餼廩從游
者衆貧者不受束脩能讀者并給火食常以一身領兩館
路隔數十餘里朝往夕來以爲常若子弟假歸稍久即親
至其家爲之督責每逢年節館中如無子弟則終日抑鬱
刻不能安鄉里中有不平事每以身任利害不計食廩
十餘年將貢入都或以他人事悞越三載仍以優等食餼
長子次躬亦相繼食餼次子廼昌理家政衣食稍裕見鄉
隣貧乏者損已周恤鄉愚多溺女捐金帛以助全活者二
三伯人戚某家固貧常迎於家均衣食必教養成立婚嫁
以時乃已有借貸者無簿券業師楊西岡先生歿後家落

迎養其師母有加禮每清明雖遠必親拜其墓三十年無
稍間其子孫輩尤每年分給衣食力謀嫁娶本州李助朝
先生端謹士也師事之歿後贍養其家并於館中設楊李
二先生神主朔望敬祀之他如倡修文廟勞怨不辭創集
利費寒士無阻至異端曲學尤爲生平所痛恨家中無僧
道入門者百十年矣著有家訓十則用示以遠并著有四
書集解卒年七十有八授徒六十年成就人材數百計其
以真誠勤學待人者始終皆如一日臨終以二事遺其長
子整飭書院刊行講書次子建立義倉積穀千石以周貧
乏餘無恨焉同治十年以次孫裕立誥贈榮祿大夫

儲玖躬傳

致躬派名尙炳字石友號松塢碧山太封翁長子通奉大
夫廼昌先生胞兄也性剛直膽識過人幼承庭訓讀書至
忠義事輒潸然泣下封翁竒賞之作文下筆千言不屑依
人門戶有古名士風弱冠補弟子員旋以優等食餼從歐
陽坦齋柳垣田周備堂諸先生遊學益進許爲魁才屢膺
鄉薦不售決棄制舉業究心戎律課徒暇取陣圖演之克
嫻其法遊其門者多半以知兵聞道光二十八年黔粵會
匪往往聚黨入州境滋事致躬察天下將亂與弟廼昌倡
行團練以兵法部伍鄉民是爲靖州練勇之始時靖會界
之地湖盜藪也久爲民害胥役不敢捕與弟廼昌率勇徑
搗其穴擒盜渠付有司治之盜風頓息二十九年歲饑游

瘡劫民倉穀附者漸眾又與弟廼昌緝獲首惡請置於法
官不爲理力爭乃得允隨勸富者減價出糶不足則私備
貲於鄰邑買米濟之三十年新甯賊李沅發反逼近州境
致躬帥壯勇至通道防堵各要隘復遣弟廼昌稟州牧裘
珉鳴廣募鄉民會營兵樹幟守城賊知有備不敢入境由
青林界竄廣西而去致躬從行軍鹽法道夏廷樾沿途尾
追不避艱險李逆就擒 詔以訓導用是爲靖勇討賊之
始未幾丁父艱廬墓三載足跡不入城市惟遣弟廼昌倡
議修城池以固根本首捐五百金嗣是有力者咸踴躍急
公鳩工甃石周圍九百一十六丈有奇煥然一新三年告
竣其弟以功授從九職銜而致躬服亦闋壬子春親帥靖

勇赴省垣會同大軍歷勦桂東藍山道州四廣橋及洋泉白水洞諸寇大帥曾侍郎國藩擬保以知縣升用加同知直隸州銜是爲靖勇出境討賊之始始出師時囑弟廼昌宜遵父遺訓以穀千餘碩設立義倉賑濟貧乏復以千餘碩製器械養義勇隨時操練以衛州城其弟一一舉行不負所託四年二月髮逆由岳州湘陰竄甯鄉盤踞城內攻躬奉曾大帥札與甥附生楊華英率勇五百冒雪疾馳乘賊未備白西門殺入礮轟刀斫殲賊首四百餘級沈賊船七十有奇奔者帶傷無數城賴克復居民悉免蹂躪初不虞賊之困猶能闖也巡行城外搜殺餘黨至南門玉潭橋見賊人數無多伏橋左右截擊之攻躬方奮勇格鬥賊漸